

國方志叢書·華中地方·第八八九號

據

清·符執桓纂修·
清康熙十二年刊本

影印

江 西 省

新喻縣志

(一)

成文出版社有限公司印行

新喻縣志序

史以徵信也。羈邑諸志，史類也。然紀載嚴覈，志雖與史同，而志則尤爲稽憲定治，拔圖攷勝，損益裁成之所本。故圖籍藏諸政府，不僅等于關石和鈞之重也。乃古今時積而事多，事積

而數多旣若禹貢所記土田賦錯而
多其法制沿革人才盛衰若周官采
風之志貞志儉而多其官師職守川
原形勢固經政之日曆而史家之藁
本哉

聖主肇興更定禮文制度百務維新而

志書宜爲首重因仍舊本非

昭代制也予初筮仕新喻按圖經喻
爲江右劇縣地多名山水且糧額
亦浮于首邑以予所聞其前賢偉蹟
雜見于他書者又不勝指下車卽進
諸蓬掖而問邑志皆對曰無有卽舊

志亦無復有存者矣予憮然久之會
守憲施檄修毘邑志乃延諸文學
掌故屬定艸數冊然亦因仍隆慶六
季所修毘志稍益篇簡而已隨刊檄
遍徵諸高行遺文及明季軼事而應
者亦鮮夫隆慶至今遠者不過百餘

李近者不下數十季季曾幾何時而
所爲章程事蹟書疏典籍夙昔流布
人間者已茫無可攷問諸後裔訪諸
故老咸不知所對而况隱德幽貞其
名湮沒而不傳者可勝道哉茲恭遇
我

皇上光昭

世祖章皇帝文治之隆日勤典學史局屢
開

聖神相傳宇內太平垂三十載而下邑
新志未定亦何以表

昭代之典章而備一方之文獻也復

奉 憲行繕志彙 呈爰以所採輯

者詳加較閱興釐必考其原經制必
詳其數人物必核其真詩文必存其
足備觀感激發者雖執筆愧于扶風
而揆藻遜夫蜀志要以備圖籍之考
信史之徵云爾計十有四卷爲喻縣

新誌焉刻成執桓伏讀而歎曰民生
之休戚風俗之淳漓城垣學治之建
立戶口地產之虧盈與兩稅之或緩
或急裁扣之或詳或略食兵養民之
或輕或重官師俸薪之或簡或優其
故可得而知矣至毓元陳星變上四

事而指斥近倖仲美諫南巡爭大禮
而萬死批鱗如斯類者可以教忠丁
雋歐陽環梁光祖傅玉聲施政等之
至行格天或門旌帝語瑞應紫芝如
斯類者可以教孝可以教弟若子澄
弘墨莊之緒石門擅理學之宗與礪

畱詩于異國西轡標韻于滇雲與乎
紬書玉殿建節屏藩者猶多其選後
來之彥聞其風者可以興矣至山川
鬱蟠正氣靡所不鍾節烈屢屢而見
也又令人憑弔而悽愴雖然尤有說
焉今天下固以塞垣諸海西南關嶺

爲邊矣此自天下太勢也切以爲腹
中亦有邊焉則地之襟帶險阨連亘
劇界者是故天下有天下之邊腹直
省有直省之邊腹各羈邑亦有各羈
邑之邊腹自江右言之控湖西之上
游而鎖鑰長衡者則宜春也記云宜

春有逃民客戶之憂焉誠憂之也自
臨江言之趾接宜春而襟承插嶺者
則喻是也今之喻卽古宜春地而近
且逃民客戶愈多焉聞明季獻賊喻
插嶺自袁入喻立其僞官而去往返
止數日耳蓋飛鏃不及瞬也又蓬戶

常聚至數千順則爲民忤則寇當時
官兵每不能禦益蔓延喻矣則喻之
爲喻實豫楚之交關而臨邰之邊隅
也後之官此者披輿圖而懷風雨所
爲撫綏制禦之方可一日而不盡心
哉

康熙癸丑仲夏穀旦

新喻令翼城符執桓撰

跋

穉邑之志卽穉邑之史也史善惡並載以
示勸懲志則專於紀善其義似乎一於勸
而懲之意不存焉然善則書之固以昭勸
而其所不書者後之有識必曰夫夫也不
足以傳於志內省之念惕焉而生又安在
志之有勸而無懲耶故以爲志主於勸則

寬以收之可也以爲志主於勸而懲卽寓焉則又不可以不嚴嚴則協乎輿情而志遂爲千秋之信史非然者雜一不善於衆善之中將書者不足以爲勸而未書者亦不足以爲懲信史之謂何何猥濫之爲也新喻舊爲臨邛輿區其志書在宋元者固荒遠無論已卽先朝石門梁先生嘗有纂